

հատ, թե ի՞նչ անցեալ է ունեցել նա, դու գիտես, թե ո՛վ է նա եւ որպիսի՛ տխուր հանգամանքներից ստիպուած ընկաւ նա Պարսկաստան: Կրկնել քեզ այդ ամենը անելորդ է: Դու գիտես եւ այն, թե Պարսկաստանում որպիսի աղքատ կեանք էր վարում Աստղաբերդի տերն ու իշխանը, պահելով իրան բոլորովին անյայտութեան մէջ, մի հասարակ որսորդի անոան տակ: Բայց մի բան չգիտես դու, եւ այդ է, որ ա՛յժմ ես պետք է պատմեմ քեզ:

Ես բոլոր ուշադրութիւնս լարեցի. նա շարունակեց.

– Դու, ի հարկէ, յիշում ես, Ֆարհատ, որ ես, Կարօն եւ Սագօն՝ երեքս միասին, թողեցինք տէր Թողիկի դպրոցը եւ անյայտացանք: Անցան տարիներ, մեր հայրենիքում ոչ ոք տեղեկութիւն չունէր մեր մասին: Ամենքը մեզ կորած էին համարում: Բայց թե որտե՞ղ էինք այդ ժամանակ, ի՞նչ էինք շինում, այդ դու չգիտես, ահա ա՛յդ է, որ պետք է պատմեմ քեզ, որովհետեւ դրա հետ կապ ունի այդ ամբողջ տիրոջ, Որսորդի առաքինութեան մի այլ կողմը, որ քեզ յայտնի չէ:

Նա մի քանի րոպէ լուռ կացաւ իր յիշողութիւնները ամփոփելու համար:

– Այո՛... հէնց նոյն օրերում, երբ մենք թողեցինք տէր Թողիկի դպրոցը, Սալմաստով անցաւ մի ամերիկացի ճանապարհորդ, մի ծերունի գիտնական, որ զանազան ուսումնական նպատակներով ուղեւորութիւններ էր անում Պարսկաստանում: Հիւանդութեան պատճառով նա մի քանի շաբաթ մնաց Սալմաստում: Մի դիպուածով նա ծանօթացաւ Որսորդի հետ: Որսորդը լսելով, որ ծերունի ճանապարհորդը հետաքրքրում է նաեւ հնութիւններով, ցոյց տոեց նրան մի թուր, որ Բաղդադի հին խալիֆներից մէկի անունն էր կրում իր վրայ: Ամերիկացին բաւական նշանաւոր գումար առաջարկեց այդ հազոագիւտ զէնքը գնելու համար: Որսորդը մերժեց նրա արծաթը, յայտնելով, թե ինքը մեծ հաճութեամբ կընծայէ նրան այդ զէնքը, եթէ նա կընդունէ կատարել իր մի խնդիրքը: Այդ խնդիրքը կայանում էր նրանում, որ ամերիկացին յանձն առնէր ինձ, Կարօյին եւ Սագօյին տանել իր հայրենիքը եւ այնտեղ տալ մի որեւէ դպրոցում ուսում առնելու: Ճանապարհի ծախքը եւ բոլոր ծախքերը՝ մինչեւ մեր ուսման ավարտելը՝ իր վրայ էր առնում Որսորդը:

– Փող նա որտեղո՞ւց ուներ, – ընդհատեցի ես Ասլանի պատմութիւնը:

– Ուներ: Այդ բերդի կործանման միջոցին նրա զանձը մնաց ծածկուած իր տեղում, թշնամու ձեռքը չընկաւ: Տարիներից յետոյ, երբ նրա մասին ամեն ինչ մոռացոեցաւ, երբ նրան ամենքը սպանուած էին համարում, նա ուղարկեց Մըհէին այստեղ եւ, իր զանձը դուրս բերելով, փոխադրեց Պարսկաս-